




# ხაშურის მთაშვე



№3 (254)

27 იანვარი, ორშაბათი

2020 წელი

- კალათბურთი -

- უმნიშვნელოვანესი მოვლენა ხაშურის სპორტის ისტორიაში -

## ქართული სუპერლიგის ALL STAR-ი ხაშურში გაიმართება

სულ რაღაც 3-4 წლის უკან, ამაზე ოცნებაც არ შეიძლებოდა. ან, როგორ უნდა გეოცნება კაცს, როდესაც ამისათვის ჩვენს ქალაქს არც შესაბამისი დარბაზი და არც შესაბამისი ინფრასტრუქტურა გააჩნდა. ახლა კი, როდესაც ადგილობრივი ხელისუფლების მართლაც შესაშური მონდომებითა და



ცენტრალური ხელისუფლების თანადგომით, ბრწყინვალე, ევროპული სტანდარტების შესაფერისი სასპორტო კომპლექსი გვაქვს, სადაც უმაღლესი დონის შეხვედრების მასპინძლობაა შესაძლებელი, ოცნება რეალობად იქცა. დიახ, ხაშური, არც მეტი, არც ნაკლები, საქართველოს საკალათბურთო სუპერლიგის „ყველა ვარსკვლავის მატჩის“ მასპინძელი იქნება. ეს მართლაც უდიდესი მოვლენაა ჩვენს სასპორტო ცხოვრებაში და, სიმართლე გითხრათ, არც მახსენდება ჩვენს ქალაქში ჩატარებული სხვა სპორტული მოვლენა, რომელიც „წონით“ უფრო „მძიმე“ იქნებოდა. საოცარი სანახაობა ელის ყველას და აქ მხოლოდ კალათბურთის მოყვარულები არ იგულისხმებიან. დიდი თუ პატარა იხილავს უმაღლესი დონის კალათბურთს და, რაც მთავარია, რაც ასე უხდება ასეთ მატჩებს – იქნება შოუ, სადაც სამქულიანების და ჩატენების კონკურსი გაიმართება.

რაც შეეხება უშუალოდ მატჩს, აქ ერთმანეთს ადგილობრივი და ლეგიონერებისგან დაკომპლექტებული გუნდები დაუპირისპირდებიან. სასტარტო ხუთეულები, ტრადიციულად, გამოკითხვის შედეგად დაკომპლექტდება, ხოლო სათადარიგოებს მწვრთნელები დაასახელებენ. ადგილობრივების (ქართველი კალათბურთელების) გუნდს ვია კახანჯიანი („ბათუმის“ მთავარი მწვრთნელი) უხელმძღვანელებს, ხოლო ლეგიონერებს – მუჰამედ ტანი (თბილისის „დინამოს“ მთავარი მწვრთნელი).

სწრაფი კონკურსი მიმდინარე სუპერლიგის სამქულიანების საუკეთესო მსროლელები მიიღებენ მონაწილეობას: საბა ლობჯანიძე („რუსთავი“), შონ რაუნდერი („ქუთაისი“), სანდრო სანაძე („თსუ“), გიორგი ვახანია („ვერა“) და ჯემს მილიკენი („ქუთაისი“). რაც შეეხება ჩატენების კონკურსს, მასში მონაწილეობა ნებაყოფლობითია.

მაშ ასე, 29 იანვარი, 18 საათი, ხაშურის სასპორტო კომპლექსი – ALL STAR -ი ყველას გელოდებათ. დასწრება თავისუფალია.



## ხაშურის მუნიციპალიტეტის საკრებულოს სხდომა

21 იანვარს, ადმინისტრაციული სახლის სხდომათა დარბაზში, გაიმართა ხაშურის მუნიციპალიტეტის საკრებულოს რიგგარეშე სხდომა, რომელსაც



უძღვებოდა საკრებულოს თავმჯდომარე მიხეილ ჯანაშვილი.

სესიაზე, დეპუტატებმა, საქართველოს მთავრობის 2019 წლის 25 დეკემბრის №649 და საქართველოს მთავრობის 2019 წლის 26 დეკემბრის №655 დადგენილების საფუძველზე, დაამტკიცეს ხაშურის მუნიციპალიტეტის ტერიტორიაზე განსახორციელებელი ინფრასტრუქტურული ღონისძიებები.

საკრებულოს წევრებმა თანხმობა მისცეს სს „სილქნეტს“, რომელიც ითხოვდა მუნიციპალიტეტის საკუთრებაში არსებული ქონებიდან 17,3 კვ.მ. არასაცხოვრებელი ფართის იჯარით აღებას.

ამავე სესიაზე, დეპუტატებმა, თანხმობა მისცეს მუნიციპალიტეტის მერს საქართველოს მთავრობის 2020 წლის 10 იანვრის №43 განკარგულებით გადმოცემული 40,25 მ<sup>2</sup> მე-2 ხარისხის (საშეშე) ხე-ტყის სოციალურად გაჭირვებულ პირებსზე გადაცემის თაობაზე.

სხდომის ბოლოს, საკრებულომ შეითანხმა მუნიციპალიტეტში, 2020 წელს, შრომითი ხელშეკრულებით დასაქმებულ პირთა რაოდენობა.

საკრებულოს მორიგი სხდომა თებერვლის თვის დასაწყისში გაიმართება.

## საქვედმოქმედო აქცია - ხაშურის მუნიციპალიტეტის მერის ორგანიზებით

საუნივერსიტეტო კლინიკა „ვივამედში“ ხაშურის მუნიციპალიტეტში მცხოვრებ 20 სოციალურად დაუცველ პაციენტს სხვადასხვა სახის სამედიცინო კვლევები ჩაუტარდა.

საქვედმოქმედო აქცია ორგანიზაცია „ქართული ოცნება - ჯანმრთელი მომავალი“-ს ინიცირებით და ხაშურის მუნიციპალიტეტის მერის - გიორგი გურასაშვილის ორგანიზებით მოეწყო.

კვლევების შედეგების საფუძველზე, პაციენტთა ნაწილს სტაციონარული მკურნალობა ასევე საქვედმოქმედო საწყისებზე უტარდება.

მსგავსი ხასიათის საქვედმოქმედო სამედიცინო აქციები სამომავლოდაც გაგრძელდება



# ა(ა)იპ „ხაშურის მუნიციპალიტეტის სკოლამდელი აღზრდის დაწესებულებების“ საბავშვო ბაღების გაერთიანების მიერ 2019 წელს გაწეული მუშაობის ანგარიში

მუნიციპალიტეტის საკრებულოს საფინანსო-საბიუჯეტო კომისიის სხდომაზე, 2019 წელს გაწეული მუშაობის ანგარიშით წარდგა ა(ა)იპ „ხაშურის მუნიციპალიტეტის საბავშვო ბაღების გაერთიანების“ მმართველი თათია ბროლიძე. პრეზენტაცია მოიცავდა სკოლამდელი აღზრდის დაწესებულებებში გასულ წელს განხორციელებულ პროექტებს, დანერგილ სიხსნებსა და არსებულ გამოწვევებს.

სხდომას უძღვებოდა კომისიის თავმჯდომარე მამუკა წიქარიშვილი. ა(ა)იპ „ხაშურის მუნიციპალიტეტის სკოლამდელი აღზრდის დაწე-



სებულებების - საბავშვო ბაღების გაერთიანების მიზანია ჩამოაყალიბოს უსაფრთხო და ინოვაციური სკოლამდელი აღზრდის გარემო, უზრუნველყოს სკოლამდელი აღზრდის დაწესებულებების მომსახურების ხარისხის მდგრადობა, ხელი შეუწყოს სკოლამდელი აღზრდის საჯარო დაწესებულებაში თანამშრომელთა პროფესიული განვითარების პროცესს, ხელი შეუწყოს სკოლამდელი აღზრდის საჯარო დაწესებულებაში ინკლუზიური განათლების პროცესს, სკოლამდელი აღზრდის საჯარო დაწესებულებაში სააღმზრდელო პროცესის ოპტიმალურად წარმართვას, ფიზიკური გარემოს ძირითადი მახასიათებლების და უსაფრთხოების პრინციპებთან დაკავშირებული საკითხების უზრუნველყ-

ოფის, სკოლამდელი აღზრდის საჯარო დაწესებულებების ინფრასტრუქტურულ განვითარებასა და გაუმჯობესებას.

ხაშურის მუნიციპალიტეტის ტერიტორიაზე სულ ფუნქციონირებს 18 საბავშვო ბაღი, აქედან, სამი გაიხსნა 2019 წელს: რეაბილიტაცია ჩაუტარდა ტეზრის და სატივის საბავშვო ბაღებს, აშენდა 8 საბავშვო ბაღის შენობა, რომელსაც დაემატა ერთი ჯგუფი და გათვლილია სულ სამ ჯგუფზე. კაპიტალური რემონტი ჩაუტარდა ვომის საბავშვო ბაღს და დაემატა ერთი ჯგუფი.

საბავშვო ბაღებში არის 62 ჯგუფი, მათ მომსახურებას უწევს 338 თანამშრომელი, მათ შორის: 62 – აღმზრდელი, 67 – აღმზრდელის თანამშემწე და 209 – დანარჩენი მომსახურე პერსონალი, საბავშვო ბაღებში რეგისტრირებულია 2000 აღსაზრდელი.

ბაღებში დანერგილია და ასევე მუდმივად მიმდინარეობს მუშაობა სასკოლო მზაობის პროგრამებზე, მეთოდისტებმა გაიარეს განათლების სამინისტროს მიერ დაგეგმილი ტრენინგი.

მეხუთე საბავშვო ბაღის ბაზაზე, სპეციალური საჭიროების მქონე ბავშვებისათვის, გაიხსნა კაბინეტი, სადაც მათ კვალიფიციურ დახმარებას უწევენ თბილისიდან ჩამოსული სპეციალისტები. პარალელურად, მიმდინარეობს სპეც. მასწავლებლების მომზადება, რომლებიც მიიღებენ გერმანულ-ქართულ სერთიფიკატებს.

2019 წელს, მნიშვნელოვანი მუშაობა იქნა გაწეული ყველა საბავშვო ბაღში, როგორც ინფრასტრუქტურული ქსელის გაფართოების, ასევე, ცალკეული საბავშვო ბაღების ახალი - ხანგრძლივი მოხმარების ინვენტარით აღჭურვის საქმეში, საბავშვო ბაღების უმრავლესობაში შეიცვალა ლეიბები, საბნები, ქსოვილი და სხვა ნივთები.

კეთილმოწყობისა და დასრულების სამუშაოები ჩატარდა სხვა საბავშვო ბაღებშიც, რაც გულისხმობს გამწოვი სისტემების დამონტაჟებებს, ფარდა-ჟალუზებით აღჭურვას, მიმდინარე რემონტებს. ყველა საბავშვო ბაღის შენობა, გარდა წრომის საბავშვო ბაღისა, გაზიფიცირებულია და უზრუნველყოფილია ცენტრალიზებული გათბობით.

საანგარიშო პერიოდში განსაკუთრებული ყურადღება ეთმობოდა საბავშვო ბაღებისათვის გამოყოფილი საბიუჯეტო სუბსიდიების მიზნობრივი ხარჯვის საკითხებს. 2019 წლისათვის, განსაზღვრული იყო 2 000 000 ლარი, რომელიც მთლიანად იქნა ათვისებული. მოცემულ პერიოდში, გამოცხადებული იქნა 40 ტენდერი. ხარჯების დაფინანსების კუთხით, შრომის ანაზღაურებას მოხმარდა 1 127 064 ლარი, საოფისე ხარჯებში აისახა 422640 ლარი, საიდანაც 218 857 ლარი მოდის კომუნალურ ხარჯებზე, ხოლო საოფისე და რბილი ავეჯის შექენაზე დაიხარჯა 104162 ლარი, კვების ხარჯებს მოხმარდა 382531 ლარი, ძირითადი ფონდების განახლებას და არაფინანსური აქტივების ზრდას მოხმარდა 45203 ლარი, აღნიშნული თანხით შექენილი იქნა მაცივრები, გაზქურები, სამზარეულოს გარნიტურები, სასაწყობო სტელაჟები, სამზარეულოს გამწოვი სისტემები და შესრულებული იქნა აგრეთვე სხვა კაპიტალური სამუშაოები.

საახალწლოდ ყველა აღსაზრდელმა მიიღო საახალწლო საჩუქარი, საჩუქრებისთვის დაიხარჯა სულ 13500 ლარი.

მიმდინარე წელს, სექტემბრის თვიდან, გათვალისწინებულია შრომის ანაზღაურების 15-20%-ის ფარგლებში ზრდა.

## ახალი პროექტი სოფლის მეურნეობაში დასაქმებულთათვის

21 იანვარს, ხაშურის ადმინისტრაციულ შენობაში, ფერმერებთან და სოფლის მეურნეობით დაინტერესებულ პირებთან საინფორმაციო შეხვედრა გამართა საქართველოს საზოგადოებრივ საქმეთა ინსტიტუტმა (GIPA) და ბიოლოგიურ მეურნეობათა ასოციაციამ „ელკანა“. შეხვედრაზე დამსწრეებს ახალი პროექტის შესახებ ემცნო, რომელსაც საქართველოს საზოგადოებრივ საქმეთა ინსტიტუტი (GIPA) პარტნიორ ორგანიზაციებთან: „ელვა - საზოგადოებრივი ჩართულობა“, „ვარნას ეკონომიკური განვითარების სააგენტო“ და „სმარტ განვითარების ცენტრთან“ ერთად ახორციელებს. ეს გახლავთ „შავი ზღვის აუზის საზღვრისპირა თანამშრომლობის პროექტი“, რომელიც მიზნად ისახავს სოფლის მეურნეობისა და მასთან დაკავშირებულ სფეროებში სავაჭრო შესაძლებლობების გაძლიერებას და მოდერნიზებას, თანამედროვე ინოვაციური ონლაინ პლატფორმის – AgroNet –ის შექმნისა და პილოტირების გზით. ინოვაციური ონლაინ სავაჭრო სივრცის შექმნა, ეფექტიანი და მოქნილი პლატფორმის სახით, პირდაპირ სარგებელს მოუტანს სოფლის მეურნეობაში მოქმედ და სავაჭრო ურთიერთობებში ჩართულ კერძო და საჯარო პირებს. პროექტის მსვლელობისას განხორციელდება პლატფორმის პილოტირება შავი ზღვის აუზის სამი ქვეყნის საქართველოს, ბულგარეთის და რუმინეთის რეგიონულ დონეზე.

თამარ ულენტი (GIPA-ს წამომადგენელი): „პროექტი მიზნად ისახავს მოქნილი ონლაინ სივრცის შექმნას, სადაც სასოფლო-სამეურნეო ვაჭრობასთან დაკავშირებული ყველა ინფორმაცია თავმოყრილი და ხელმისაწვდომი იქნება ერთ სივრცეში, უფასოდ. ამასთან, ონლაინ სივრცე იქნება დია სხვადასხვა მომხმარებლებისათვის. წყაროები მოიცავს, მრავალენოვან, დახარისხებულ ინფორმაციას ეროვნული კანონმდებლობის, რეგულაციების, სტანდარტების, ბაზრის ტენდენციებისა და სხვა სახის ინფორმაციების შესახებ. გარდა ამისა, პლატფორმას ექნება გზამკვლევის ფუნქცია, თუ რა, სად და როგორ უნდა გაყიდონ ან შეიძინონ სხვადასხვა სახის სასოფლო-სამეურნეო საქონელი ან მომსახურება.“

ონლაინ სასოფლო-სამეურნეო სავაჭრო პლატფორმა დაეხმარება ფერმერებს, სასოფლო სამეურნეო კოოპერატივებს, საცალო და ბითუმად მოვაჭრეებს, ექსპორტიორებს, სასაწყობო და სხვა საწარმოებს, გაიუმჯობესონ თავიანთი საქმიანობა სოფლის

მეურნეობის სფეროში, მიუახლოვდნენ სურსათის უვნებლობის საერთაშორისო სტანდარტებს და მოიძიონ სოფლის მეურნეობისა და მასთან დაკავშირებულ სფეროებში არსებული უახლესი ინფორმაცია.

ონლაინ პლატფორმაზე განთავსდება საქართველოს საინფორმაციო პორტფოლიო სოფლის მეურნეობის ვაჭრობის თემაზე, სადაც თავმოყრილი იქნება ისეთი წყაროები, როგორცაა სხვადასხვა ნაშრომები, კვლევები, სამართლებრივი დოკუმენტები, სახელმძღვანელოები და ა.შ. დაგეგმილია, რომ პლატფორმაზე დარეგისტრირდება მინიმუმ 150 მომხმარებელი, რომელიც დაინტერესებული იქნება სავაჭრო პარტნიორების მოძიებით. გარდა ამისა, პლატფორმაზე დარეგისტრირდებიან კერძო და საჯარო ორგანიზაციები, რომლებიც გააზიარებენ საჯარო ინფორმაციას.

შეხვედრის ორგანიზება უზრუნველყო სოფლისა და სოფლის მეურნეობის განვითარების სააგენტოს ხაშურის საინფორმაციო-საკონსულტაციო ცენტრმა.



# ეს - ჩვენი ისტორიაა, ეს - ჩვენი წარსულია...

კომუნისტურმა ეპოქამ საქართველოს კი არა, ათეულობით ქვეყანას და მილიონობით ადამიანს დაასვა დალი. მთელი 70 წელი იცხოვრა ქართველმა ხალხმა ამ რეჟიმში და თუ დღეს ქვეყანა ჯერ კიდევ ვერ გაიმართა წელში, გარკვეულწილად, ისევ იმ ეპოქის დამსახურებაა. დღეს მკითხველს 1938 წელს, ხაშურში გამომავალი ადგილობრივი გაზეთის („ბოლშევიკური სიტყვა“) მცირე სტატიებს ვთავაზობთ, რომელშიც ნათლად ჩანს კომუნისტური მარწუხებიც და იმ ბნელი წლების საშინელებიც. დღევანდელი გადასახედიდან, ეს სტატიები ოდნავ ღიმილის მომგვრელია, მაგრამ წარმოიდგინეთ, რა ხდებოდა მაშინ. მაშ ასე, 1938 წელი...

## მხურვალე მადლობა ბელადს

ბედნიერი ახალგაზრდობა გვაქვს, აღტაცებით და გამარჯვებით ვზეიმობთ დიად დღესასწაულს. ჩემს სიცოცხლეში საბჭოთა ხელისუფლებამ და დიდმა სტალინმა შექმნა ნამდვილი, სამარადისო გაზაფხული, საამური ცხოვრება და განა მარტო ჩემს სიცოცხლეში, ათასებს, მილიონებს აჩუქა მან ბედნიერება.

ჩემი ბავშვობა მენშევიკების ბატონობის წლებში გაიპარა, უსწავლელი ადამიანი უნდა ვყოფილიყავ, სიდუხჭირეში უნდა დაღუულიყო ჩემი სიცოცხლეც, მაგრამ გვიშველა ჩვენი მშობლებისა და უფროსი ძმების შეიარაღებული ბრძოლით საბჭოთა ხელისუფლების დამყარებამ.

ღარიბმა, 16 წლის სოფელმა ბიჭმა 1926 წელს დაიწყო ცხოვრების ანბანის შესწავლა, წერა-კითხვის უცოდინარობის სალიკვიდაციო სკოლის დასრულების შემდეგ, 5 წლის განმავლობაში საშუალო პედაგოგიური განათლება მივიღე და დღეს მასწავლებელი ვარ. ყოველდღიური მზრუნველობით ჩემს ქვეყანას მომავალ ექიმებს, ინჟინრებს, მასწავლებლებს და მეცნიერ მუშაკებს ვუზრდი. ესაა ჩემი ბედნიერება, ჩემი სიხარული.

კომკავშირმა აღძრა ჩემში მარქს-ენგელს, ლენინ-სტალინის მოძღვრების გულდასმით შესწავლის სურვილი, მანვე მასწავლა საკუთარი მოვალეობისადმი ნათელი პასუხისმგებლობის გამოჩენა და დღეს, გამარჯვებთანა 20 წლის თავზე ფიცს ვაძლევ სამშობლოს: ჩემი ყოველი შესაძლებლობა შენია, და მრისხანე უამს, თუკი მტრები თავს დაგვესხმიან, ჩემს ახალგაზრდულ სიცოცხლეს, სისხლის წვეთწვეთად შევწირავ შენი დიდებისა და სიმდიდრის დაცვას.

არჩ. ბარბაქაძე,

ხაშურის მე-4 სრული საშუალო სკოლის მასწავლებელი

## მოწინავე მესაუბრე-წამკითხველი

ხაშურის საავადმყოფოს მუშა-მოსამსახურეებს ენერგიული მესაუბრე-წამკითხველი ჰყავთ ამხანაგ გრ. ჭკუასელის სახით. ამხანაგი გრიშა ყოველ დასვენებაზე, როცა მისი მსმენელები სადმე შეჯგუფდებიან, მათ გაზეთს უკითხავს ჩვენი ქვეყნის და საერთაშორისო საკითხების ირგვლივ. ამხ. გრიშას თავის მუშაობაში დიდ დხმარებას უწევს მსმენელთა დაინტერესება და აგრეთვე ისიც, რომ ავტოსაუბარზე დასწრებას და დამუშავებულ საკითხების აღრიცხვას ზუსტად და სისტემატურად ახდენს.

ს. სლანოვი

## იშვიათი შემთხვევა

ამას წინათ, სოფელ პ. სატივეში მცხოვრებ სიმონ მაჭარაშვილის ფურ-კამენმა მოიგო ერთი ზაქი, რომელსაც ჰქონდა სამი თვალი, ორი ცხვირი და ოთხი ყური.

ზაქის ცხვირი, ორი თვალი და ორი ყური ჩვეულებრივად იყო, მხოლოდ ერთი თვალი და ცხვირი თავის ორივე ყურით ზაქის თავის მადლა იყო დაკავშირებული. ზაქს სამივე თვალიდან კარგი მხედველობა ჰქონდა და ყველა ორგანო ჩვეულებრივ მოძრაობაში იყო.

ზაქმა რამდენიმე საათს იცოცხლა და მოკვდა.

პ. კვინიკაძე

## მშრომელთა წერილები მუშაობა ახლაც ცუდად წარმოებს

გასულ სასწავლო წელს რაიონში ხალხის უბოროტესმა მტრებმა ჩაშალეს წერა-კითხვის უცოდინარობის და მცირე მცოდნეობის ლიკვიდაციის საქმე-2969 უცოდინარიდან გამომდინარე იქნა მხოლოდ 44 კაცი.

წერა-კითხვის უცოდინარობის და მცირემცოდნეობის ლიკვიდაციისთვის ბრძოლა ახლაც არადაამაჰყოფილებლად მიმდინარეობს. ცხრამუხის, ცოცხნარის, ვაყის და დირბის სასოფლო საბჭოებში წერა-კითხვის უცოდინარობის საქმეზე სკოლის ყველა დირექტორი და მასწავლებელი არ მუშაობს. სოფელ ქემფრის დაწყებითი სკოლის მასწავლებელმა, ე. ბარბაქაძემ ლიკსკოლის მეცადინეობა 12 დღეს გააუღინა. დირბის სასოფლო საბჭოში მეცადინეობა დღევამდღეობით წარმოებს, სკოლის დირექტორი კი ასეთ ამბავს ყურადღებას არ აქცევს.

ღროა, წერა-კითხვის უცოდინარობას და მცირემცოდნეობას ბოლო მოეღოს. აკ. მაღლაკელიძე

## საკაღრისი პასუხი მიიღეს

15 მარტს, სურამის სარეწაო არტელების მუშა-მოსამსახურეთა მფრინავ მიტინგზე მოსმენილი იქნა ამხანაგ გ. ლეჟავას ინფორმაცია უმაღლესი სასამართლოს სამხედრო კოლეგიის მიერ “მემარჯვენე-ტროცკისტული ბლოკის” მიმართ გამოტანილი განაჩენის შესახებ, მუშები მქუხარე ტაშის გრიადლით შეხვდნენ ღირსეულ განაჩენს, ხალხის მტრების მიმართ.

სიტყვით გამოსული ამხანაგები: მ.ჯანაშვილი, გ. ხარაზოვი, გ. ამირგველაშვილი და სხვები უდიდესი ზიზღით იხსენებდნენ პირსისხლიანი აგენტების საშინელ საქმიანობას, რომლებმაც ჩვენს ქვეყანას გამოსტაცეს ლენინ-სტალინის პარტიის ერთგული ადამიანები: ს. კიროვი, ა. გორკი, კუიბიშვილი და სხვა.

მიტინგის მონაწილეებმა ერთსულოვნად მოიწონეს უმაღლესი სასამართლოს განაჩენი ხალხის მტრების მიმართ. ისინი ბოლშევიკურ სიტყვას აძლევენ ლენინ-სტალინის პარტიას, რომ კიდევ უფრო დაირაზმებინ და გაანადგურებენ იმათ, ვინც წინ აღუდგება ჩვენი ქვეყნის ძლევა-მოსილ წარმატებას.

## სტალინურმა კონსტიტუციამ უზრუნველყო ჩვენი ბედნიერება

ორი წელი გვაშორებს იმ ისტორიული დღიდან, როდესაც საბჭოების მე-8 საკავშირო საგანგებო ყრილობაზე მშრომელთა საყვარელმა ბელადმა, დიდმა სტალინმა წინ გადაგვიშალა თავისუფლების დიდი ქარტიის-სტალინური კონსტიტუციის რაობა და მნიშვნელობა. აქ, ამხანაგმა სტალინმა სასტიკად გაამათრახა ყველა ისინი, რომლებიც თვლს ხუჭავდნენ და არა სურდათ და არც სურთ ისტორიაში ჯერ არნახული, რაც მოპოებულია და ოქროს ასოებით აღნიშნულია სტალინურ კონსტიტუციაში.

ჩვენი ბედნიერება სამარადისოდ უზრუნველყოფილია სტალინური კონსტიტუციით, საბჭოთა ხალხები ყოველდღიურად სარგებლობენ მისი სიკეთით, შრომის, დასვენების უფლებებით. მთელი საბჭოთა ხალხი, გმირული წითელი არმია ერთგულად დგას უძვირფასესი კონსტიტუციის დაცვის სადარაჯოზე.

ჩვენ, საბჭოთა ადამიანებს კარგად გვახსოვს, რომ საბჭოების ქვეყანა გარემოცულია კაპიტალისტური ქვეყნებით. ეს გვაგადაღებულებს კიდევ უფრო გავშალოთ ქვეყნის თავდაცვა, გავაძლიეროთ კლასობრივი სიფხიზლე და არავის მივცეთ უფლება ხელი შეახოს ჩვენს ბედნიერ ქვეყანას, რომლის მიღწევებიც ამეტყველებულია საბჭოთა კონსტიტუციის ფურცლებზე, კონსტიტუციისა, რომლის ავტორიც დიდი სტალინია.

## ურჩი მოქალაქე

თავაშებული მოქალაქეა კოტე ფანწულიძე, მისთვის საბჭოთა კანონების მოქმედება არ არსებობს, ის ყველაფერს თავისი “არშინით” ზომავს.

ამ ადამიანს სამ წელიწადს მალულად ჰქონდა მოწყობილი სამჭედლო და როგორც სურდა ისე აძრობდა ტყავს მომხმარებლებს. ფანწულიძის ეს სპეკულანტური მოქმედება გაიგო რაიფინგანის უფროსმა საგადასახადო ინსპექტორმა ამხ. ალ. ლომიძემ და თანახმად არსებული კანონისა იგი დაბეგრეს 1100 მანეთით, ფანწულიძემ კი შური ჩაიღო “ღვარძლიან გულში”.

8 ნოემბერს, სურამიდან მომავალ ალ. ლომიძეს დაეწია ფანწულიძე, ჯერ “მეგობრული” საღამო მისცა, შემდეგ კი თავის “მტერს” ფიზიკურად გაუსწორდა და მგზავრები რომ არ გამოჩენილიყვნენ ა. ლომიძის დასაცავად, მას სიკვდილით გაუსწორდებოდა.

ხულიგან და სპეკულანტ ფანწულიძეს სასტიკი პასუხი უნდა მოეთხოვოს. შ. ფრანგიშვილი

## სიკვდილი „მემარჯვენე-ტროცკისტული ბლოკის“ მონაწილეებს ასეთია ჩვენი რაიონის მშრომელთა ერთსულოვანი მოთხოვნა არავითარი დანდობა მოლაღატეებს

პირველ მარტს შესდგა ხაშურის ამხანაგ ბერიას სახელობის ელდეპოს მუშა-მოსამსახურეთა და ინჟინერ-ტექნიკოსთა მიტინგი. დამსწრენი უდიდესი აღშფოთების გრძნობით გაეცვენ “მემარჯვენე-ტროცკისტული ბლოკის” მონაწილეეთა ჯაშუშურ-მავნებლურ-დივერსიულ მოქმედებას.

სიტყვებში გამოსული ამხანაგები: ჩხენკელი, კურტანიძე, ქვირია და სხვა. აღნიშნავენ, რომ ფაშისპის პირსისხლიანმა აგენტებმა “მემარჯვენე ტროცკისტული ბლოკის” მონაწილეებმა ჩვენი ქვეყნის წინაშე უსაზიზღრესი დანაშაული ჩაიდინეს; ისინი ჰყიდდნენ საბჭოთა კავშირს, ხოცავდნენ ღირსეულ ადამიანებს. მათ მოჰკლეს ლენინ-სტალინის პარტიის ერთგული ადამიანები: კიროვი, კუიბიშვილი, მენჟინსკი, გორკი და სხვა. მშრომელი ხალხის მტრები უნდა მოისპონ. პროლეტარული სასამართლო, რომელიც ამჟამად ასამართლებს მათ, ღირსეულ სასჯელს მიუზღავს.

ჩვენ საკუთარი მკერდით დავიცავთ დიდი ოქტომბრის რევოლუციის ძვირფას მონაპოვარს, რკინის კედლად გარს შემოვრტყმევით ხალხთა საყვარელ ბელადს დიდ სტალინს, კიდევ უფრო ავიმადლებთ რევოლუციურ სიფხიზლეს და საწარმოო დავალებას 150 პროცენტით შევასრულებთ. ნათქვამია ელდეპოს მუშა-მოსამსახურეთა და ინჟინერ-ტექნიკოსთა მიტინგის მიერ მიღებულ რეზოლუციაში.

## გუდგირი პროპაგანდისტი

ქემფრის პარტსაკანდიდატო პოლიტსკოლის პროპაგანდისტი ამხ. გ. ლომიძე თავის მოვალეობის შესრულებას გულგრილად ეკიდება-მეცადინეობას არასაპატიო მიზეზით ხშირად აცდენს. 14 და 21 მარტს პოლიტსკოლის მსმენელებმა პროპაგანდისტს დიდხანს უცადეს, მაგრამ იგი მეცადინეობის ჩასატარებლად არ გამოცხადდა. უმოქმედო პროპაგანდისტ ლომიძემ თავის მოვალეობა უნდა შეიგნოს. ს. აბულაძე

## შაქრის ქარხლის სტახანოველი

ზემო აძვისის კოლმეურნეობის წევრმა ანდრო ხაჩიძემ ენერგიული შრომით კოლმეურნეთა სიყვარული დაიმსახურა. ის ყველა სამუშაოს კარგი ხარისხით ასრულებს, დილით სამუშაოზე ადრე გამოდის და იქიდან თავის დროზე ბრუნდება. ასეთი მუშაობით ანდრო დღიურ ნორმებს ორმაგად და უფრო მეტი გადაჭარბებით ასრულებს. შაქრის ქარხლის რიგთა შორის გაფხვიერება და გამოსწორვა ხაჩიძემ მასში გაპიროვნებულ ნაკვეთში 7 კალენდარულ დღის ნაცვლად, 3 დღეში და მაღალი ხარისხით ჩაატარა.

ანდრო შესანიშნავად უვლის მუშა პირუტყვს. კარგი ზრუნვით და დასუფთავებით მოვლილი ხარები სანიმუშონი არიან. პ. ხაჩიძე





# სოფლის მხარდაჭერის პროგრამის“ ფარგლებში პროექტები, ნელსაც 40 მლნ ლარით დაფინანსდება



„სოფლის მხარდაჭერის პროგრამის“ ბიუჯეტი, რომელიც რეგიონებში განსახორციელებელი პროექტების ფონდიდან ფინანსდება, შარშანდელის მსგავსად, წელსაც 40 მლნ ლარია. პროექტების ჩამონათვალში მცირე ცვლილებები შევა და არსებულ კატეგორიებს გზისპირა მოსაცდელეები დაემატება. კორექტივები დოკუმენტში, საქართველოს მთავრობის დადგენილების თანახმად, გასულ წელს შერჩეული პროექტების ანალიზის შედეგად და საჭიროებებიდან გამომდინარე განისაზღვრა.

2019 წელს, პროგრამის ფარგლებში, 4800-მდე ინფრასტრუქტურული პროექტი განხორციელდა. მუნიციპალიტეტებში სულ 3 ათასზე მეტი საერთო კრება ჩატარდა და მოსახლეობამ ყველა პროექტი თავად შეარჩია. აქედან, გურიაში განხორციელდა 376 პროექტი, იმერეთში – 1042 პროექტი, კახეთში – 366 პროექტი, მცხეთა-მთიანეთში 536 პროექტი, რაჭა-ლეჩხუმ-ქვემო სვანეთში 275 პროექტი, სამეგრელო-ზემო სვანეთში – 1061 პროექტი, სამცხე-ჯავახეთში – 309 პროექტი, ქვემო ქართლში – 399 პროექტი და შიდა ქართლში – 447 პროექტი.

ცენტრალური ბიუჯეტიდან გამოყოფილი თანხის გარდა, გასულ წელს, პროექტების განხორციელებისთვის მუნიციპალიტეტების თანადაფინანსებამ 6 მლნ ლარი შეადგინა, თანხები კი შემდეგი კატეგორიების მიხედვით გადანაწილდა: გზების რეაბილიტაცია, გარე განათებისა და სპორ-

ტული ინფრასტრუქტურის მოწყობა, წყლის სისტემების გამართვა, სასაფლაოს კეთილმოწყობა და სანიაღვრე არხების გაჭრა-გაწმენდა.



## ათასწლეულის ინოვაციის კონკურსში წაღვის საჯარო სკოლა ნახევარფინანსირებაში გავიდა

ათასწლეულის ინოვაციის კონკურსი 2019 წლის 26 ოქტომბერს გამოცხადდა. კონკურსი მეექვსე წელია ხორციელდება ათასწლეულის ფონდის მიერ, საქართველოში აშშ-ის საელჩოს ფინანსური მხარდაჭერით. კონკურსის მიზანია ახალგაზრდებში ინოვაციებისა და ახალი ტექნოლოგიების შექმნის წახალისება. კონკურსის შედეგად გამოვლინდება სამი საუკეთესო გუნდი საქართველოს მასშტაბით, რომლებიც წარმოადგენენ პროექტებს ინოვაციების, ახალი ტექნოლოგიებისა და საბუნებისმეტყველო სფეროში. პირველ ადგილზე გასული გუნდი 2020

წლის ზაფხულში გაემგზავრება NASA-ში, აშშ-ში. მეორე და მესამე ადგილზე გასულ გუნდები, ასევე, მონაწილეობას მიიღებენ STEM პროგრამებში და/ან დაჯილდოვდებიან სხვადასხვა პრიზებით.

წლებანდელ კონკურსში მონაწილეობას იღებდა წაღვის საჯარო სკოლაც. ამ დღეებში კი გავრცელდა ცნობა, რომ წაღვის საჯარო სკოლა ნახევარფინანსირებაში გავიდა, რომელშიც სულ 32 მონაწილეა.

ნახევარფინანსირებას ინტერვიუები თბილისში, თებერვლის თვეში გაიმართება. ჩვენს მრავალრიცხოვან მკითხველთან ერთად, ვულოცავთ სკოლას ამ წარმატებას და ვუსურვებთ შემდეგი ნაბიჯიც ასეთივე წარმატებული იყოს. იმედია, ასეც იქნება.

-იუმორი-

## კანიბალიზმიდა გვაკლდა...

რეკლამის ისტორია ჯერ კიდევ ანტიკური ხანიდან იწყება. იტალიაში ვულკანური ფერფლით დაფარული პომპეის გათხრებისას, არქეოლოგებმა ბევრი წარწერა აღმოაჩინეს, რომლებიც სარეკლამო შინაარსს ატარებდნენ. საბჭოთა კავშირის დროს, გაქანებული “გეგმიური ეკონომიკის” პირობებში, რეკლამა თითქმის იგნორირებული იყო და, რატომღაც, “კაპიტალისტურ მავნებლობად” ითვლებოდა. დღეს, ყველას კარგად მოეხსენება, რომ რეკლამის გარეშე, რაიმე კომერციული წარმატების მიღწევა, უბრალოდ შეუძლებელია. რეკლამა ყველგანაა-ტელევიზიების საეთერო დროის ღირსის ნახევარი მათ უჭირავთ და არც ყოფით ცხოვრებაში განვიციდით მის ნაკლებობას. ქუჩები პირდაპირ ახუნძლულია სარეკლამო ბანერებით და ზოგჯერ ისეა ეს ბანერები “გადახლართული” ერთმანეთში, ვეღარც თავს ვებულობ და ვეღარც ბოლოს. ა.ბატონო მაგალითიც: ხაშურის ცენტრში, ორი სხვადასხვა ბანერის “სინქრონიზ” მივიღეთ ისეთი კურიოზი, რომელიც თავიდან გაგაურჟოლებს კაცს, შემდეგ კი გაგედამება, მაგრამ ვაი, ასეთ ღიმილს. ისე, როგორია სრულიად უცხო ადამიანი სეირნობს ხაშურის ქუჩებში და უცებ ბანერი: “ქალთა და მამაკაცთა ხორცი”. შეიძლება ვინმე დაინტერესდეს კიდევ და იკითხოს, აქაური ხორცია? არც გაგვიკვირდება, ჩვენი ხორცი რომ ბევრად აღემატება უცხოურს. მაგალითად, ჩინელების ხორცი ძალიან გამომშრალია, იტალიელებისას – მაკარონის სუნი ასდის, ამერიკელებისას – ძალიან მსუქანია, კოლუმბიელებისას – ნარკოტიკებითაა გაჯერებული და ა.შ. ეკ, ხუმრობა იქით იყოს და სავაჭრო ობიექტების მფლობელებმა პერიოდულად მაინც უნდა ამოწონ თავისი სარეკლამო ბანერები, თორემ ხედავთ რა “შავ” კურიოზამდე მივიღვართ? კანიბალიზმიდა გვაკლდა ქართველებს.?!



ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი გიორგი გოგალაძე, მისამართი: ხაშური, ტაბიძის ქუჩა №2. ტელეფონი: 24 30 27. E-mail Khashurismoambe2015@gmail.com მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499. P-ით მონიშნული სტატია იბეჭდება დაკვეთით გაზეთი იბეჭდება თბილისში. რედაქტორი რობერტ სუხიაშვილი.